



Minggu, 27 Pebruari 2022

Ogen: Kuan-kuanen 31: 12-13



Mejingkat



Kegeluhen ndehara i bas jabu e me gambaren kekelengen Dibata si tulus engkelengi manusia. Nande/Moria i bas jabu pe la itung-itungen guna nehken kekelengen i bas jabu. Nande tetap mereken kekelengen alu dem pengorbanen. Gambaren sederhana, nande milih pudin man gelah anggota jabu sikap perpanna, nande nggit la man buah adina sitik ngenca buah si tersedia, nande pudin ersikap adina berkat ku ja pa pe gelah enggo sikap lebe kerina anggota jabu. Bage kin si mehulina ilakoken sekalak nande i bas tengah-tengah jabu. E me nande si tuhu-tuhu ndalanken si mehuli i bas jabu. Bage maka lit kemalemen ate si igejabken mamre ras anak-anak. Pedah nande Lemuel (Salomo) man bana i bas Kuan-kuanen 31 enda guna ndarami diberu si erkemalangen man Dibata gelah pentar dinggen cerdas i bas jabu.

Ayat 12 isuratken, kerina perbahanenna tulus, la pernah iukurkenna si la mehuli man perbulangenna. Uga maka enda banci jadi? Tek ia perbahanenna si mehuli ibahnna e mulihken man bana jadi kemalemen ate. Memang ilakokenna alu palas kiniteken man Dibata si iterapkenna i bas jabu. Ayat 13 igambarken ndehara si mejingkat, la pertewas. Ilakokenna guna keluargana, kinijingkatenna erguna i bas jabu. Pepulung benang wol ras lenen janah nenunsa, seh kari i bas musim mbergeh la ndele atena, baju panas enggo sikap guna keluargana.

Sedauh enda moria, uga kinijingkatenta i bas jabu? Enggo dage tulus entah pertewas denga nge kita? Rugi siakap adi kita ngenca ndahiken dahin e, mis siukuri seh kal latihna siakap. Uga? Dekahen kita menuntut gelah mamrenta pe mejingkat erdahin alu tutus piah mawen e mpeturah perubaten? Tetaplah sibereken dirinta guna engkelengi jabunta, Dibata mere gegeh kengasupen man banta moria.

➤ Jadilah tulus i bas engkelengi jabu, mejingkatlah!